



*Selasa, 24 Mei 2022*  
**Ogen: Pengerana 5:2-4**



**"Ola Metersa Erbahan Padan"**



**L**it sekalak dilaki si ertoto man Dibata gelah ia dat dahin. Suari berngi e lalap pemindonna man Dibata, seh maka bas sekali paksa ertoto ia nina man Dibata, *Tuhan sampatiNdulah aku segelah aku dat dahin, adi kudat dahinku kugeleh manuk, kuundang pagi man rumah kerina pertua diaken bas runggunku.* Piga-piga wari dung ertoto e dat dahin me ia. Emaka nggo erdahin ndai ia, nina ka ertoto, *Tuhan nggo erdahin ndai aku, emaka mindo ka aku segelah iban min posisiku si mantapna bas kantorku e je saja pagi sekaligus kuban acara man-man ndai labo enca man pertua diaken tapi man kerina sada sektorku, pertua diaken, rikut ras pandita kerina je kari nggo banci geleh 1 kambing.*

Bulan berganti bulan, itamaken me ia bas sada posisi si cukup strategis bas kantorna eme jadi wakil manajer. Emaka ertoto ka ia mulihi nina, *Tuhan tanggung kel baNdu aku jadi wakil manajer ban min sekaligus aku jadi manajerna Tuhan, e kari janji kel aku Tuhan kutukur 1 lembu segelah man-man kami sada runggun si jadi pengataken bujurku pagi.* Lenga bo sempat ndekah, piga-piga wari kenca e perusahaan inganna erdahin ndai mengalami kebangkrutan besar-besaren simengakibatkan perusahaan inganna erdahin e harus tutup. Sada manuk si nggo ipadankenna seh ku 1 lembu jadi padanna si terakhir, sada pe lenga sempat ilakokenna.

Pernah nge kita bage? Nukah kel erban padan ku Dibata. Nina kitab Pengerana 5:2-4 ola metersa erbahan padan. Padan e jadi sada perjanjinta ras Dibata. Ula permainanen padan e. Perban adi sipermainanen padan e, berarti kita mpermainanen Dibata. Ngasup nge kam? Adi nina kitab Pengerana ndai, kalak si la ngkunduli padanna maka ia erdosa. Kalak sib age nembek kel ate Dibata ngeninsa. Perpadanenta e jadi sada bukti segelah kita banci tetap setia i bas ketutusenta man baNa. Adi kita nggo erpadan berarti siap kita i bas segala kondisi ras pengorbanen.